

**Wednesday, November 26, 2025**

**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

**CHAMPHAI HS JUBILEE**

Education Minister Dr. Vanlalhlana chuan vawiin khan Govt. Champhai High School Golden Jubilee (kum 50 tlin) lawmna hun a hmanpui.

Dr. Vanlalhlana chuan Govt. Champhai High School chu school lar tak, zirna leh infiamnaah hlawhtlinna pawh lo nei hnem tawh an ni a ti a. Mihring chuan thil tum an nei theuh a, Champhai tan leh mahni sikul tan thil tha duh chuan mahni theuh an pawimawh tih a sawi. Sikul motto "Labour First, Pleasure Next" tih chu a tha hle tih sawiin nakina eizawna leh chhungkaw chawmna nei turin he thupui hi vuan nghet tlat turin zirlaite a chah a. Zirna hi chakna a ni a, Mizoram chuan human resources a nei tha hle a ni tih a sawi a, chu'ng siamtu chu zirtirtute an nih tih sawiin zirtirtute kawng hrang hranga naupang kaihruai thiam tur leh mahni inthlak thiam naupang hrang hrang enkawl tura inzir turin a chah a ni.

Minister chuan zirtirtu indaih loh chhan leh thil kalphungte tarlangin, primary schhol-ah za zelah 20 vel, Middle School ah zaah 56 vel leh high School levelah za zelah 59 zirtirtu hmun ruak a awm mek a ni a ti a, zirtirtu semrual a harsat thu a tarlang baw a ni.

He hun hi Headmaster Pi Lalhlimthangi Khiangte chuan a kaihruai a khuallian leh kalkhawm te lawmna thu a sawi a. Zirtirtu Pu Vanlalchhana Hmar chuan report tawi, Golden Jubilee rel dan te a sawi. Director of School Education Pi Angela Zothanpuii chuan Golden Jubilee Souvenir, Tlaizawng tih a tlangzarh a, thu tawi a sawi baw. Zirlai lo ni tawh thinte atangin thusawi ngaihthlak a nih bakah zai leh intihhlamma hrang hrang a awm baw a, Minister hovin tlaiah ruai theh nghal a ni ang.

Govt. Champhai High School Golden Jubilee lawmna hi naktukah chhonzawm a ni ang a, Champhai North bialtu MLA Er. H. Ginzalala khuallian a ni dawn a ni.

Dr. Vanlalhlana hian nimin khan Govt. Tualte Primary School kum 100 tlinna lawmna a telpui baw a. Zirlaite chu faina leh hriselna te ngai pawimawh turin a fuih a, bawlhhlawh an neih leh hmuh apiang bawlhhlawh bawmah paih zel turin a chah a. Tualte vanglai thleng leh thei turin zirna ngai pawimawh turin a chah a, Tualte Primary School leh Tualte khua vul zel turin duhsakna a hlan a ni. Tualte khua chu tomato thar tam ber an nihna angin khaw taima an ni tih a hriat hle a ni tih a sawi a, ketchup siam na'n te pawh an hmang tawh a, a ropui hle a ni tih sawiin lo taima chhonzawm zel turin a fuih baw. Ramngaw humhalh kawngah pawh an tha hle a, khawvel hmasawn zelnaah ramngaw a pawimawh em em a, tha taka enkawlin ramngaw leh ramsa te humhalh zel turin a fuih baw.



**NIT CONVOCATION**

National Institute of Technology (NIT) Mizoram Convocation vawi 9-na chu nimin khan Lengpui, Community Hall-ah hman a ni.

He hunah hian Prof. Devendra Jalihal, IIT Guwahati Director chu khuallian a ni a, NIT Mizoram Convocation vawi 9-na hi Harshavardhan Neotia, Board of Governors Chairman, leh Prof. S. Sundar, NIT Mizoram Director te chuan an kaihruai a ni. Report atanga a lan danin NIT Mizoram zirlai chhuak tharte atang hian za zela 97 point 1 laiin hna an hmu nghal a, zirlaite hi heng company hriat hlawh tak takah te placement an hmu a ni. Heng bakah hian Kum 2026 graduating batch atanga zirlai za zela 50 chuang chuan NVIDIA, Siemens, Schneider Electric, L&T, HSBC, Deloitte, BNP Paribas, Infosys, leh Cubastion company ah te hna an hmu tawh a, Campus recruitment drive hi la kalpui mek zel a ni bawk.



## **ZPDS**

Zoram Poultry Development Society-te hmalakna in kumin September thla thleng khan Mizoram chhungah ar note 87,247 awp keu a ni tawh.

Akashvani News Aizawl zawhna chhangin, Aizawl Ramrikawn a Zoram Poultry Development Society a thawktute chuan ar chi thum, broiler, rainbow rooster leh Indbro brown layer tui te awp keu hna an thawh thin thu an sawi a, rainbow rooster chu cheng 45/- a pek chhuah a nih thin bakah broiler note pawh cheng 45/- atanga 55/- inkara an pek chhuah theih thu te, Indbo brown layer chu cheng 65/- a lei tur an kawl reng thu leh district dang a thawnchhuah a nihin motor thawna man, a note pakhatah cheng 3/- a nih thin thu an sawi a ni.

Kan correspondent report i lo ngaithla ang :



## **NO TOLERANCE WEEK**

Kolasib District Police-te chuan December ni 15 atanga ni 22 inkar chhung hian ngaihnathiamna awm lova lirthei endik runpui ‘No Tolerance Week’ Kolasib district chhungah an kalpui dawn a. He hun chhung hian inhriatthiamna awm lovin dan bawhchhiate hrem an ni ang. Lirthei khalhtute leh neitute'n document pawimawh zawng zawng nei vek tur leh tinung vek turin Kolasib district SP Pu Lalrinpuia Varte chuan hriattirna a chhuah a. Helmet khum lova lirthei ke pahnih nei chi khalh, kum tling lo lirthei khalh, Driving license nei loa lirthei khalhte pawh a na thei ang bera hrem tur an ni ang.



## **ROAD BLOCK**

Kawnpui leh Durtlang inkar kawng (km 122 leh km 155 inkar) chu BRN Infrastructure Pvt. Ltd. ten siam that hna (resurfacing) an thawh avangin December ni 12 thleng he lai kawng hi khar a ni.

Aizawl district SP thupek angin kawng hi nitin chawhnu dar 1 leh dar 2 inkarah hawn a ni ang a, tlai dar 4 atanga a tuk zing dar 9 thleng hawn a ni bawk ang a, a bak zawng chu kawngpui hi khar a ni ang. Kawng hawn lai hian LMV leh a hnuai lam chin chauh kal tlang phal a ni a, lirthei lian chu Sairang-Kawnpui lamah kal tur a ni. He thupek hian chhiatrupna thil, kangmei leh emergency kaihnawih a duty, dan leh thupek pawimawh bik a Police leh Magistrate duty te chet velna a huam lo ang. He thupek bawhchhia chu Motor Vehicle Act, 1988 section 179 hmanga hrem theih an ni ang.

